


www.BibleForChildren.org

Matthew 26



Olom eygew
sakbyey chi
Piyasta'n Lallausan,
ummoy cha Jesus ud
Bethany, un ilin Lazarus.
Ha leyaki'n pilaulin Jesus
tilagu'n latoy. Ot langaya si
Mary si kagodwan chi
litro un apyus chi nardo,
un amod chi ngilalan byangbyanglu.
Ot insiitla si cha ikin Jesus ot
pilulasala si buukla. Ot
malomchommachom chi
sungsungla si byeyoy.




Ot si Judas Iscariot, osa kan cha lasawayan si chuwa'n disipulus Jesus, ummoyla inyibit si Jesus kan cha ap-apun cha papachi.


Latetteyokcha'n langngey si imbyegala ot ingkaricha un idchencha siya si pilak. Ot illugila'n lansingit si wayala'n mangiyibit kan Jesus.



Tiluttuwan cha disipulus chi imbyegan Jesus ot ummoycha insagala mangalancha si kakan chi Piyasta'n Lallausan. Si manga-mangalancha, langayà Jesus si tilapay ot lanyaman kan Apudyus. Ot pilispis-igla asila ot illidchon kan cha disipulusla un kalala, "Eḃanyu alla ta kalonyu. Allaya long-egku."



Ot langaya bo si latatasan byeyas
ot kasin bo lanyaman kan Apudyus.
Ot illidchola kan chicha un kalala,
“Umilum kayu losan si alla.
Laoy chi chayak un mampaloklok si
baru'n katuɣagen Apudyus kan cha
tagu. Libukbuk chi chayak ta
mapakawan cha byasbyasuɣn cha
achu'n tagu.”



Oli pun kalan Jesus kan Peter, “Simon, Simon, Chongyom ked! Chilawat Satalas chi wayala un mamachas kan chikayu losan, ta itullongla lu silu masagat kan chikayu un isun chi mantopa si pagoy ta matan-in chi chugi ya bilayu. Ngim iluwaluwak sika, Simon, ta achipun maabyak chi pammatim kan sakon.”



“Ked lu kasinka mansagung kan sakon, pakoscheyom chi pammatin cha bubuynlu.” Ngim kalan Peter, “Apu, sisasagalaak un mibyayud ya makakatoy kan sika.” Kalan Jesus, “Ibyegak kan sika, Peter, sakbyey un malullakuk chi kawitan si sala’n labi, mamitluwom sakon puklitan.”




Oli pun, ummoy cha Jesus kan cha disipulusla si lugey'n ngadloncha Gethsemane ot kalala kan chicha, "Umamuy kayu yan utla ta inyak malluwalu si anchi." Kalala, "Ama, Ama, kabyeeyam un koon cha losan. Ilisim otyan kan sakon cha alla'n ligat. Ngim chakampun un ha piok chi makwa, ngim ha piom chi matungpey."




Ot impuyut Judas cha susuychachu ya uchum un guwechan chi Templo un imbuun cha papangat cha papachi ya cha Pariseo. Lan-eeymascha ya langiyawitcha kan cha pilatud. Ot ha osa kan chicha, liliwasla machuwalan un ingan chi musassun chi kangatuwan un pachi. Ngim kalan Jesus, "Agey lait." Ot illayala ingan labyakeg ot impeogla.



Chilokmaanchà Jesus ot illiyoycha si byeyoy chi kangatuwan un pachi. Lituntun-ud si Peter un bummabyattawa. Lan-apuy cha tagu si man-alichuwancha si gawan chi paway chi byeyoy ot ummoy lakaalichu si Peter kan chicha.



Osa kan cha bubùulon
chi kangatuwan un pachi
ked agin chi leyaki'n
liliwas Peter ingala,
ilimusla, “Chakampun
oyya un intullongku sika
un kadwala si gechin?”
Ngim kasin Peter piluklitan,
ot kakma lalullakuk chi
kawitan. Ummoyon si Peter
ot lan-ibi-ibin.




Lummalibbyat cha Kukunsisey ot
illiyoycha si Jesus kan Pilate un
Gubillachu. Kalan Pilate kan siya,
“Sika kamma Arin cha Judio?”
Kalan Jesus un summongbyat,
“Ustu imbyegam.”
Pion Pilate un ibuus si
Jesus ot kilaugudla kasin
cha tagu. Ngim
pummalakuycha,


“Ilansam si krus!
Ilansam si krus!”




Oli pun impuꝿang Pilate si Jesus kan
chicha ta milansa si krus. Ot illayan
cha susuꝿchachu si Jesus, ot
impabukudcha kan siya krusla ot
ummoycha si lugeꝿ'n ngadloncha
“Lugeꝿn chi Bettukeg,” un ngadloncha
Golgotha si ugud un Hebrew.



Ot udchi langilansaancha kan
Jesus si krus ot illansacha bo cha
chuwa'n akkawan si kruscha. Ot
langgawaoncha si Jesus.



Ot langkadwa lapissay chi ketila'n lissasàoy si templo,
lallugi si ngatu ot ipacheyala. Ot illipkaw Jesus un
kalala, "Ama, ipuyangu kan sika kalichodwak!"
Imbyegala pu hachi, latoy.




Lummaschom pun, un lansagalaan
cha Judio si Sabyechu un
man-illongan, lantuntuled
ummoy si Joseph un
iyArimathea kan Pilate ta
chawatola lecheg
Jesus. Siya ked osa'n
machaychayaw un
kukunsisey ya osa

bo'n manguuway
si Mampangatan
Apudyus.



Ot ngummila si Joseph si mamputilak
un luput. Ot ummoyla ilopas chi
lecheg Jesus si krus ot
bilussungla si hachi'n luput.

Ot ummoyla illigga si
lobon un tilikitikancha'n
byetu. Ot liligedla
chakey'n byetu ta
iplotla si sawang
chi lobon.



Labigat pun, si Sabyechu'n man-illongan
cha Judio, ummoy cha ap-apun cha
papachi ya cha Pariseo
kan Pilate. Ot kalanha,
"Apu, masmasmokmi si
katattagun chi lait un
mangallilaw, un
imbyegala, 'Lu
lumaus chi tiyu'n
eygew,

umuliyak
matagu kasin."




Ot ummoyoncha ot ummoycha amman
bilantayan chi lobon ot
limeykaancha chi olobla
ot impabyentaycha
kan cha suychachu.




Lagamput pu Sabyechu'n
man-illongan, si wiswisngit chi
Chuminggu un umula'n
eygew, ummoycha Mary
Magdalene ya osa'n
Mary intullong chi
lilobolan Jesus.
Oli pun illiggala
amod un chita,

ti lan-osog chi osa'n
anghel Apudyus un
lampeypu'd langit.




Ot liligedla biletun olob chi lobon
ot ummamuyala. Simpapayogpog
cha mambyebyentay si
ogyatcha ot isun chi
latoy chi tullongcha.




Ngim kalan chi anghel kan cha
byebyai, “Achi kayu umogyat,
ammuk un siya singsingtonyu
si Jesus un lilansa si krus.

Lappun siya utla, ti
ummuli latagu un siya
imbyegala. Umali
kayu ta itullongyu
langibyelatancha
kan siya.”




Ot kakmacha ummoyon si hachi'n lobon.
Ulay lu ummogyatcha, amod chi galascha.
Ot lalodchakcha'n umoy langibyega
kan cha disipulusla. Ot ilabot
Jesus chicha ot kalala, "Kumusta
kayu!" Ot kummatamcha kan
siya ot lampalintumingcha ot
kummamodcha si ikila ot



chilaychayawcha siya.






Si alungusla, lampaila bo kasin kan cha lasawayan si ossaan un disipulusla si manga-mangalancha. Ot ilomꝯala chicha si kilakuꝯang chi pammaticha ya kilatangkin chi somsomokcha ti achipuncha teꝯon mamati kan cha langitullong kan siya si ummuliyala lataguwan. Lagamput pu imbyegan Apu Jesus kan chicha, lipangatu'd langit ot ummamuy si machuwalan Apudyus.



Gapu si amod un man-aayat
Apudyus kan cha tagu, illidchola
ossaan un alakla ta lu silu mamati
kan siya, achipun misila kan
Apudyus ta machusa ngim
maidchen si biyeg un
mallalayun.



54



60



Romans 3:23

Losan un tagu lakabyasuḡ, ked lappun makakopya si machayawan Apudyus.

Romans 6:23

Ti ha byayed chi byasuḡ ked otoy. Ngim ha biyeg un mallalayun idchon Apudyus un sagutla gapu si litimpuyugen taku kan Apu taku'n Jesu Kristu.

Hebrews 9:27

Lakodchongan chi tagu un matoy mamingsan, ked lu magamput, kuison Apudyus.



Ephesians 2:8,9

Ked gapu si kachegun Apudyus, siya lalaguwala kan chitaku gapu si pammati taku kan Jesu Kristu, ked chakampun un gapu kan cha bibiyu'n killingwa taku, ti illidchon Apudyus. Ked achipun makwa un ipaspasweyn chi tagu.

Romans 10:9,10

Ta lu ibungangayyu un si Jesus chi Ap-apu ya patiyonyu si somsomokyu un tilagun Apudyus siya kasin, matatagu kayu. Ti ha mamatiyan taku kan Jesu Kristu, ibilang Apudyus chitaku lalintog ya gapu si mangibungangayan taku un Jesus chi Apu ked siya bo mataguan taku.



John 3:16,17

Gapu si amod un man-aayat Apudyus kan cha tagu, illidchola ossaan un alakla ta lu silu mamati kan siya, achipun misila kan Apudyus ta machusa ngim maidchen si biyeg un mallalayun. Ti chakampun si imbuun Apudyus chi Alakla utla lubang ta kodchongala cha tagu, ngim imbuunla taplu taguwola cha tagu.

1 John 5:11-13

Ked ha insistigun Apudyus, illidchola kan chitaku biyeg un mallalayun, ked leypu alla'n biyeg kan Alakla. Ha tagu'n litimpuyug si Alak Apudyus, awed kan siya biyeg un mallalayun. Ngim ha tagu'n achipun litimpuyug si Alak Apudyus, lappun kan siya biyeg un mallalayun. Ha langisuyatak kan cha alla kan chikayu'n mamati si ngachen chi Alak Apudyus, taplu agammuwonyu un awed kan chikayu biyeg un mallalayun.



Matthew 26-28; Luke 22-24; John 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Lubuagan Kalinga NT (knb) © 2009, Wycliffe
Bible Translators, Inc. in cooperation with
Translators Association of the Philippines

<https://live.bible.is/bible/KNBTAP/MAT/1>

©2025 Bible for Children, Inc.

www.M1914.org

www.bibleforchildren.org

